

## DOMENIE XXIV «VIE PAL AN»

### Antifone di jentrade cf. Sir 36,15-16

Dàur la pâs, Signôr, a di chei che ti spietin,  
par dâur reson ai tiei profetis.  
Scolte, Signôr, la preiere dai tiei fameis e dal to popul, Israel.

### Colete

Diu, che tu âs creadis e tu rezis dutis lis robis,  
cjalinus e danus di servîti cun dut il cûr,  
par sintî i benefizis de tô bontât.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Es 32,7-11.13-14

Il Signôr al lassà pierdi dut il mâl che al veve menaçât al so popul.

Dal libri dal Esodo

In chei dîs, il Signôr i disè a Mosè: «Spessee! Va jù, parcè che il to popul, che tu âs fat saltâ fûr dal Egjit, al va vie di cjâf. No ur à coventât masse par lâ fûr de strade che jo ur vevi dit di lâ. Si àn fat un vidiel cul metal fondût e si son butâts in zenoglon denant di lui. I àn ufiert sacrificis e i àn dit: Ve chi, Israel, il to Diu, che ti à tirât fûr de tiele dal Egjit!». Il Signôr al zontà: «Lu ài tignût di voli chest popul: al è un popul cjaviestri fûr di misure. Cumò lassimai a mi: mi è montade sù une fumate che ju fruci cence remission: ma o fasarai di te un popul grant».

Mosè al fasè l'impussibil par bonâ il Signôr so Diu, e i disè: «Parcè mo, Signôr, varessistu di cjapâte cussì cun chest popul che propit tu tu âs fat saltâ fûr dal Egjit cu la tô grande fuarce e cu la tô man tremende? Visiti dai tiei fameis Abram, Isac e Jacop, che tu ur âs zurât sun te e che tu ur âs dit: O moltiplicarai la vuestre gjernazie tant che lis stelis dal cil, e dute cheste tiele che us ài fevelât us e darai a la vuestre gjernazie e le varan in ereditât par in eterni».

E il Signôr al lassà pierdi dut il mâl che al veve menaçât al so popul.

Peraule di Diu.

### SALM RESPONSORIÂL dal Salm 50

R. Danus la gjonde dal perdon, Signôr.

Ve dûl di me, o Diu, parcè che tu sêis bon,  
e pal to grant bonvolê pare jù il gno pecjât;  
lavimi di dutis lis mês colpis,  
smondeimi dal gno pecjât. R.

Cree dentri di me un cûr mont, o Diu,  
torne a metimi intor un spirt che nol mole.  
No sta parâmi lontan dai tiei vòi,  
no sta lassâmi cence de tô sante soflade. R.

Signôr, vierç tu i miei lavris,  
e la mêm bocje che e cjanti la tô laude.  
Il gno sacrifici, Diu, al è un cûr pintût,  
un spirt che si pintis e si plee  
tu, Diu, no tu lu spreseis. R.

### SECONDE LETURE 1 Tm 1,12-17

Crist al è vignût tal mont par salvâ i pecjadôrs.

De prime letare di san Pauli apuestul a Timoteu

Jo o ringrazii Crist Jesù, nestri Signôr, che mi à dade fuarce parcè che mi à ritignût degn di fiducie metintmi al so servizi; propit me, che prime o jeri un blestemadôr, un persecutôr e un violent. Però mi è stade doprade misericordie parcè che o vevi fat chel tant ta l'ignorance, cuant che o jeri lontan de fede. Che anzit la gracie dal Signôr nestri e je lade adiriture parsore cu la fede e cul amôr che al è in Crist Jesù.

Di fat cheste e je une peraule che e merte crodude e acetade: Crist Jesù al è vignût tal mont par salvâ i pecjadôrs, che il prin o soi jo. Ma propit par chel o ài cjatade misericordie: par che Jesù Crist al mostràs in me, par prin, dute la sô bontât, come esempi di chei che a varessin crodût in lui pe vite eterne.

Al Re dai secui, l'incorutibil, invisibil e unic Diu, glorie e onôr pai secui dai secui. Amen.  
Peraule di Diu.

### CJANT AL VANZELI cf. 1 Zn 4,16; 3,20

R. Aleluia, aleluia.

Nô o vin ricognossût e crodût  
al amôr che Diu al à par nô:  
se il nestri cûr nus condane,  
Diu al è plui grant dal nestri cûr e al cognòs dut.

R. Aleluia.

### VANZELI Lc 15,1-32

E sarà plui contentece in cîl par un pecjadôr che si convertîs.

Dal vanzeli seont Luche

In chê volte, chei che a scuedevin lis tassis e i pecjadôrs a levin dongje di Jesù par scoltâlu. I fariseus e i dotôrs de leç a brunkulavin disint: «Chel chi al acetè i pecjadôrs e al mangje cun lôr». Alore Jesù ur contà cheste parabule: «Cui di vualtris, se al à cent pioris e int piert une, no lassial lis novantenûf tal desert par lâ a cirî chê che si è pierdude fin che no le cjate? Cuant che le cjate, se cjame su pes spalis dut content, al torne a cjase, al clame i amîs e chei dal borc e ur dîs: Fasêt fieste cun me, parcè che o ài cjatade la mê piore che si jere pierdude. Cussì, us dîs, e sarà plui contentece in cîl par un pecjadôr che si convertis che no par novantenûf juscj che no àn dibisugne di conversion.

O cuale femine, se e à dîs dracmis e int piert une, no impie il lampion e no scovie pulît la cjase e no si metie a cirî cun cure fintremai che no le à cjatade? E cuant che le à cjatade, e clame lis amiis e chês dal borc e ur dîs: Fasêt fieste cun me, parcè che o ài cjatade la dracme che o vevi pierdude. Cussì, us dîs, i agnui di Diu a fasin fiestone par un sôl pecjadôr che si convertis».

E ur diseve: «Un om al veve doi fîs. Il plui zovin i disè al pari: Pari, dami daurman la part di ereditât che o ài dirit. Alore il pari al spartì la robe fra i doi fîs. Pôcs dîs dopo, il fi plui zovin, ingrumade dute la sô robe, al partì par une region lontane e li al mangjà dut ce che al veve vivint di sporcacjon. Dopo che lui al veve netât fûr dut, e rivà in chel païs une grande carestie e lui al scomençà a cjatâsi intrigât. Alore al lè di un dal puest e si metè a vore sot di lui. Chel lu mandà tai cjamps a passonâ i purcits. Pe fan che al veve, al varès bramât di passisi magari cul glant che a mangjavin i purcits, ma nissun no i 'nt dave. Alore, tornât in se, al disè: Ducj i fameis in cjase di gno pari a àn tant ce mangjà che a vuelin e jo invezit culi o mûr di fan. O tornarai di gno pari e i disarai: Pari, o ài pecjât cuntri dal cîl e cuntri di te; jo no merti plui di jessi clamât to fi. Tratimi come un dai tiei fameis. Si metè in viaç e al tornà di so pari.

Biel che al jere inmò lontan, so pari lu viodè e al sinti compassion di lui. I corè incuintri, i butà lis mans tor dal cuel e lu bussà. Il fi i disè: Pari, o ài pecjât cuntri dal cîl e cuntri di te. No merti plui di jessi considerât to fi. Ma il pari ur dè ordin ai servidôrs: Svelts, puartait chi la vieste plui biele e metêtje intor; metêtji l'anel tal dêt e i sandui tai pîts. Cjapait il vidiel ingrassât e copaitlu. Fasin fieste cunton grant gustâ, parcè che chest gno fi al jere muart e al è tornât in vite, al jere pierdût e al è stât cjatât. E a tacarin a fâ fieste.

Il fi plui grant al jere tai cjamps. Tal tornâ, cuant che al fo dongje di cjase, al sinti a sunâ e a balâ. Al clamâ un dai servidôrs e i domandâ ce che al jere sucedût. Il servidôr i rispuindè: Al è tornât dongje

to fradi e to pari al à fat copâ il vidiel ingrassât, parcè che al à tornât a vê so fi san e salf. Lui si inrabià e nol voleve jentrâ in cjase. Alore so pari al jessì par cirî di convincilu. Ma lui i rispuindè a so pari: A son agns e agns che ti fâs di famei e no ài mai disubidît a un sôl dai tiei ordins. Cun dut a chel, tu no tu mi âs mai dât un cjavret di lâ a fâ fieste cui miei amîs. Cumò invezit che al torne cjase chest to fi che al à straçât ducj i tiei bêçs cu lis sdrondinis, par lui tu âs fat copâ il vidiel ingrassât. I rispuindè il pari: Fi gno, tu tu sêts simpri cun me e dut ce che al è gno al è ancje to; ma si scugnive fâ fieste e jessi contents parcè che chest to fradi al jere muart e al è tornât in vite, al jere pierdût e al è stât cjatât».

Peraule dal Signôr.

### **Su lis ufiertis**

Scolte, Signôr, lis nestris preieris  
e indegniti di acetâ chestis ufiertis dai tiei servidôrs,  
par che al zovi a la salvece di ducj  
ce che ognidun di nô al à presentât par onorâ il to non.  
Par Crist nestri Signôr.

### **Antifone a la comunion Sal 35,8**

Cetant che al vâl il to boneçûr, Signôr!  
Te ombre des tôs alis i fîs dal om a van a parâsi.

### **Daspò de comunion**

La gracie dal regâl dal cîl che e cjapi paronance, Signôr,  
des nestris animis e dai nestris cuarps,  
par che o sedin guidâts simpri dal to Spirto  
e no des nestris inclinazions.  
Par Crist nestri Signôr.